

Mid-Day Dogri News Bulletin, 30th May 2025

समे — 12:25

<><><><><><>

HM Jammu Poonch

गृह मंत्री अमित शाह होरें अज्ज बन्ने आहले जिले पुंछ जाइयै उत्थे पाकिस्तानी गोलाबारी दी मारै हेठ आए दे परोआरें कन्नै मलाटी कीती। एहदे शा पैहले शाह होर पुंछ च पाकिस्तानी गोलाबारी करी प्रभावत होए दे गुरुद्वारे बी गे। शाह होर कल सं'झां द'उं दिनें दे दौरे पर जम्मू पुज्जे हे। जम्मू राजभवन च उ'नें कल सं'झां उपराज्यपाल मनोज सिन्हा ते होरनें आला अधिकारिएं कन्नै इक उच्ची सतह दी बैठक लाइयै खित्ते च सुरक्षा हालात दा जायजा लैता हा।

<><><><><><>

Agriculture Minister Jammu

केन्द्री कृषि मंत्री शिवराज सिंह चौहान अज्ज जम्मू च विकसित कृषि संकल्प अभियान दे तैहत आयोजित करसान सम्मेलन च हिस्सा लै'रदे न। आकाशवाणी दे जम्मू संवाददाता दी रिपोर्ट मूजब, विकसित कृषि संकल्प अभियान दा आयोजन आई.सी.ए.आर. ते केन्द्री राई-बाई मंत्रालय आसेआ राज्य सरकारें दे सैहयोग कन्नै 29 मई थमां 12 जून तगर 700 शा मते जिलें च कीता जा'रदा ऐ। केन्द्री कृषि मंत्री होर अज्ज स्कॉस्ट जम्मू च विकसित कृषि संकल्प अभियान गी शुरु करोआ'रदे न। स्कॉस्ट जम्मू दे वाईस चांसलर प्रोफेसर बी. एन. त्रिपाठी होरें आखेआ ऐ जे इस कार्यक्रम दा मकसद करसानें गी राई-बाई खेत्तर दिएं नमिएं तकनीकें बारै जानकार बनाना ऐ।

<><><><><><>

Dar Viksit Krishi

तोआई कल स्कास्ट कश्मीर दे कनवेंक्शन सेंटर च कल विकसित कृषि संकल्प अभियान दे शुभारंभ दे मौके उपपर उद्घाटन समारोह दा आयोजन कीता गेआ जेहदे च राई-बाई मंत्री जावेद अहमद डार होरें कार्यक्रम दी अध्यक्षता कीती। 15एं दिनें तोहड़ी चलने आले इस अभियान दा उद्देश्य करसानें गी नमिएं तकनीकें बारै जागरूक बनाने दे कन्नो-कन्नी फसल राहने ते हैलें दे इस्तेमाल लेई मिट्टी दे नरोएपन सरबंधी सॉयल हैल्थ कार्ड दे इस्तेमाल बारै जानकार करना हा। लोकें दे किट्टु गी संबोधत करदे होई मंत्री होरें करसानें गी राई-बाई सरबंधी वैज्ञानिकें कन्नै जुड़ने लेई गलाया।

<><><><><><>

Udh Viksit Krishi

भारत सरकार दी बशेश पैहलकदमी – विकसित कृषि संकल्प अभियान उधमपुर जिले च बी रम्भ होई गेदा ऐ। इस सरबंघै च चनैनी, डुडु ते चनुन्ता ब्लाकें दे 9वें ग्राएं च करसानें लेई जागरूकता कैपें दा आयोजन कीता गेआ। इस किस्मै दे कार्यक्रमें दा आयोजन सब्भन 17एं ब्लाकें च कुल 135 थाहरें पर कीता जाहग। कृषि विकास केन्द्र थमां साईसदानें ते होरनें सरबंघत अधिकारिएं आसेआ करसानें गी राई-बाई दे खेत्तर च अपनाई जा करदी नमिएं काहडें ते तकनीकें बारै जानकारी दिक्ती गई। एहदे अलावा करसानें गी जैविक खेती ते मिट्टी दी नरोई सेहतू बारै बी जागरूक बनाया गेआ।

<><><><><><>

DyCM – Udh Visit

उपमुख्यमंत्री सुरिन्दर चौधरी होरें कल उधमपुर दा दौरा लाइयै उत्थें पीडब्ल्यूडी आस्सेआ तोड़ चाढ़े जा'रदे गौरमेट मैडिकल कालेज दे निर्माण कम्में दा जायजा लैता। अपने दौरे दरान उपमुख्यमंत्री होरें कम्म तोड़ चाढ़ा'रदिएं अजेंसिएं गी कम्म दी रफ्तार बधाने ते जुलाई 2025 दे तैह समें दे अंदर अंदर परियोजना दा कम्म मुकमल करने दे निद्रेश जारी कीते। एहदे शा पैहले उपमुख्यमंत्री होरें उधमपुर दे बगलामुखी मंदर च मत्था टेकेआ ते जम्मू कश्मीर दे लोकें दी सुख-शांति लेई प्रार्थना कीती।

<><><><><><>

Rana Mughal Road

जंगलात ते पर्यावरण मंत्री जावेद अहमद राणा होरें शोपियां जिले च पीर की गली दा दौरा लाया। इस दरान मंत्री होरें पीर की गली च सैलानिएं लेई बुनियादी ढांचे गी बधाने ते मुगल रोड दे कन्नै पर्यावरण संरक्षण गी बढ़ावा देने दे महत्व उप्पर जोर पाया। उनें गलाया जे विभाग आसेआ पीर की गली च सैलानिएं लेई ट्रांजिट कैप बनाए जाडन जेहदे च उ'नेंगी आरामदायक बसाने आली थाहर दी सुविधा थोई सकोग। यात्रुएं दी जरूरतें गी पूरा करने लेई पर्यावरण दे स्हाबै हट बी बनाए जाडन। अपने दौरे दरान मंत्री होरें हिरपोरा वन्यजीव सेंचुरी दा बी निरीक्षण कीता।

<><><><><><>

Rana Surankote visit

जल शक्ति मंत्री जावेद अहमद राणा होरें कल पुंछ जिले दे सुरनकोट च बफलियाज दी परनाई पन बिजली परियोजना दा जायजा लैता ते पानी दे स्रोतें सरबंघी प्रबंधन च मकामी समुदायें दे हितें गी प्राथमिकता देने दे महत्व उप्पर लोह पाई। मंत्री होरें गलाया जे जम्मू कश्मीर दे लोकें दा अपने पानी दे संसाधन उप्पर पैहला हक्क ऐ ते उ'दे हितें दी राखी करना लाजमी ऐ। परनाई पन बिजली परियोजना दी मजूदा स्थिति दा जायजा लेंदे होई मंत्री होरें कम्म तोड़ चाढ़ा'रदिएं अजेंसिएं गी समें उप्पर कम्म मुकमल करने दे निर्देश

जारी कीते। परनाई परियोजना दे दुए गेड़ तैह्त्त मेंढर दे बक्ख—बक्ख क्षेत्रें गी पर्याप्त तौरा उप्पर सिंचित बनाने, मकामी राई—बाई गी बढ़ावा देने ते लोकें दे जीवन स्तर च सुधार आह्वनने दी योजना बनाई गेदी ऐ।

<><><><><><>

Shabd

प्रसार भारती — प्रसारण ते प्रसार आस्तै सांझे ऑडियो—विजुअल यानि पीबी शब्द नै यूट्यूबर्स, पॉडकास्टर्स ते वीडियो संपादकें गी मुफ्त सेवा प्रदान करने दे मकसद कन्नै पंजीकरण करोआने लेई साहा दिता ऐ। पीबी शब्द कॉपीराइट—मुक्त, प्रमाणिक ते इस्तेमाल च सुरक्षित सामग्री आस्तै इक उत्कृष्ट जरिया ऐ। पीबी शब्द, यूट्यूबर्स ते क्रिएटर्स आस्तै बिजन कुसै भुगतान दे मुफ्त ते प्रमाणिक मीडिया समग्री प्रदान करदा ऐ। शब्द कश 1,500 थमां मते रिपोर्टर, संवाददाता ते स्ट्रिंगर्स दा इक मजबूत नेटवर्क ऐ।

<><><><><><>

IPL

आईपीएल क्रिकेट च रॉयल चैलेंजर्स बैंगलुरु नै जंदी रातीं खेड़दे गेदे पैहले क्वालीफायर मुकाबले च पंजाब किंग्स गी 8एं विकटें कन्नै हराइयै फाईनल च अपनी थाहर बनाई लैती ऐ। पंजाब आसेआ दित्ते गेदे 102 द्रौड़ें दे लक्ष्य दा पिच्छा करदे होई बैंगलुरु नै छड़े 10एं ओवरें च गै जित्त हासल करी लैती। अज्ज होने आहले एलीमिनेटर मुकाबले च मुंबई इंडियंस दा मुकाबला गुजरात टाईटन्स कन्नै होग।

<><><><><><>